

Ha'u nia respeitus ba:

Sua Exelénsia Ministra Dulce de Jesus Soares, Señora Nicole Seibel Xefe-Projetu ba HATUTAN nia Programa Edukasaun no Nutrisaun

Onra ida mai ha'u mai-hamutuk ho ita-boot-sira hodi lansa Hahán ne'ebé Atu fô Tulun ho Nutrisaun no Edukasaun, (HATUTAN) nia programa edukasaun no nutrisaun.

HATUTAN patrosinadu husi Estados Unidos Amérika nia Departamentu Agrikultura nia Programa McGovern-Dole, ne'ebé apoia edukasaun, dezvoltimentu labarik nian, no seguransa ai-han ho fundus dolar miliaun rua-nulu-resin-noon (\$26 miliaun). Objetivu prinsipál husi Programa McGovern-Dole maka atu hamenus hamlaha, mellora literasia no apoia edukasaun primária – liu-liu ba labarik feto sira.

Estados Unidos nia Departamentu Agrikultura hili Timor-Leste sai McGovern-Dole nia Prioridade ida tanba oportunidade boot-sira atu kria impaktu pozitivu iha ne'e. Programa ne'e sei mellora Timoroan-sira nia moris liuhusi apoia labarik sira-nia saúde no edukasaun. Sei apoia mós agrikultór-sira hodi kuda ai-han nutritivu, sustentável ba sira-nia comunidade-sira.

Bazeia ba estudus resentes, porsentu rua-nulu-resin-ualu (28%) husi labarik-sira iha nasaun sira em-dezvoltimentu ho pezu menus ka sofre raes (labarik nia altura badak liu nia otas) tanba mal-nutrisaun. Mal-nutrisaun bele impede labarik sira-nia dezvoltimentu habilidades ba pensamentu kítiku, fatór ne'ebé nesesáriu tebes hodi kompete iha mundu ohin lora ne'e.

Timor-Leste la mesak deit iha nia luta hodi redús mal-nutrisaun. Hamlaha nu'udar problema ida iha nasaun barak – inklui Estados Unidos Amérika. Programa McGovern-Dole no nia parseiru lokál sira jere programas hamutuk tolu-nulu-resin-lima (35) iha nasaun-sira hamutuk rua-nulu-resin-noon (26) hodi oferese nutrisaun di'ak liutan ba mentes joven sira ne'ebé hamlaha iha mundu tomak.

Estados Unidos kontente tebes apoia HATUTAN nia ekipa talentoza ne'ebé komposta husi Care International, Mercy Corps, no WaterAid iha ámbitu McGovern-Dole nia Programa Hahán ba Edukasaun.

HATUTAN nia ekipa sei serbisu hodi mellora nutrisaun infantil no asegura jersaun sira tuirmai iha asesu ba nutrisaun ne'ebé nesesáriu ba aprendijazen, kresimentu, no dezvoltimentu. Ho ema Timoroan liu rihun atus-tolu rua-nulu-resin-noon (326,000) ne'ebé espera sei benefisia husi programa ne'e iha eskola-sira iha Ermera, Liquiça, Ainaro, no Manatuto, projetu HATUTAN mós sei apoia mudansa pozitivu iha nível nasional.

Sustentabilidade importante tebes ba HATUTAN nia programa. Departamentu Agrikultura no programa nia implementadór-sira hakarak garante katak comunidade-sira ne'ebé programa ne'e serbi bele hafoin ne'e kontinua HATUTAN nia atividade-sira ba oin bainhira programa ne'e termina ona.

HATUTAN mós sei kolabora ho agrikultór lokál-sira hodi hasae liutan produsaun produktu lokál sira atu nune'e eskola-sira bele sosa ai-han lokál no família-sira iha área rurál bele hetan rendimentu faan ne'ebé aas liutan.

Estadus Unidus Amérika nu'udar apoiante orgullozu ba Timor-Leste nia joven-sira no comunidade-sira ne'ebé sustenta mentes joven sira ne'e. Ami-nia esforsu-sira la pára deit iha nutrisaun, maibé mós inklui ajuda finanseiru no tékniku ba eskola sira, projetu sira ba inan no labarik sira-nia nutrisaun – sira ne'e hotu mellora labarik sira-nia kapasidade atu aprende molok sira sama ain iha sala-de-aula ida.

Ami dedikadu atu kombat mal-nutrisaun no raes iha Timor-Leste liuhusi HATUTAN nia fóku ba merenda eskolar, Millennium Challenge Corporation nia esforsus oin-oin hodi redús raes, USAID nia programa Aumenta Reziliénsia Komunidade liuhusi proteje comunidade nia bee-matan, no projetu-sira seluk tan.

Estadus Unids komprometidu ajuda Timor-Leste nia joven-sira no sira-nia comunidade-sira moris ho saudável, prósperu no atinje sira-nia potenciál hanesan partisipantes ativos iha demokrasia vibrante ida ne'ebé ekonomikamente diversa.

Obrigada dala-ida tan ba ita-boot-sira hotu mai hamutuk ona ho ami iha dadeer ne'e hodi celebra lansamentu ba HATUTAN. Ita-boot-sira nia esforsu-sira sei hadi'ak liutan poténsia aprendizajen joven Timoroan rihun ba rihun – investimentu ne'ebé di'ak liu hotu. Realmente, presiza dunik Suco ida hodi garante nasaun ida ne'ebé saudável ho ai-han asegurado.